

korkoring ha kowaw ila

koko' ray 'oem'oemaeh 'ima komi'aewpir, maya' minaSa:eng ray bato'
babaw, 'aehae' maylaS 'inay batbato'an kas'oehaez, siya homSoS
losa'sa'i' 'ima rae:iw, sowiti' talokonay hi koko' 'ima komi'aewpir, maya'
miyahaehae:ae'. koko' patae'aes ka tatawae', 'omam'amoe
mowa:i' 'omawpo' hi maya', romamramay Sa', " 'izi' hangih ila... ya:o
tapanabih ka kinbaze'an ay? " kama minowa' baze' kinbaze'an maya',
ngeSngeSngeS Sa, " 'a:ay, 'a:ay... " 'isa:a' koko' manabih ila.

kakhayza'an hayza' 'aehae' korkoring kamamanra:an, siya 'iyapinanae'
ka maylaS, papaskayzaeh hi yaba' ka boehoe: 'inisiya, ni yaba' Sikayni',
rima' papaskayzaeh hi 'oya' ki koko' Sikayni' 'oyaeh. korkoring ma'
minbala' lobih ila ray taew'an, nisiya ray binlengan sini'laeh ka 'ae'az,
so'so'hae' poypo:on ray basang ki sinpe:an, 'isa:a' mari' ka Siloe' kaSlatar.

korkoring mowa:i' ray te:ne' langi:, ta:'itol ray 'ima 'ibabaw ra:a', ray
panga' sas'el a tomal homahalih ila, 'am nak kowaw 'iyahinayap
kita'en. 'oemoe'oe: hi yaba' ki 'oya' nisiya Sa' " 'oya' yaba' yako 'am
hokowaw ila o " yaba' ki 'oya' Sa' "kaSra:i' a! So'o 'izi' bi'i:, yami
tapaskayzaeh ka boehoe: 'iniSo', nakhiza 'am Saehae', 'am'amoe

kaSra:i' ! " siya kaybaze' sowiti' ni yaba' rinamramay ka 'inoe'oe:.

'insiya' a yaba' 'am ta:'itol ila, Sin ta:inin korkoring mam homangih
boeloe' ka Siloe' ray te:ne', te:ne' ralom makSa' 'a'oetoe' ila . 'ima haeba:an
mae'iyah komoSa' " 'ampowa' nakhini kita'en " korkoring ta:in mayaka:i'
ila, " yaba', yako 'am ha kowaw ila. So: 'oma:zaw nanaw 'okay 'oral,
torong ka Sa:wan Sina' noka titiyon a pazay tawbon, mari' ka Siloe' ha:ong
ka kawaS, So: yako ray bala' babaw homngas, ma' 'am 'omoral,
pinamowa'an hayza' ka 'a'oral 'am 'alikaeh sem'el, 'am tabin ka kipazayen.
So: 'okay 'intaewaeh 'omoral nanaw, hingha' 'owaz ka kawaS, So: ya:o ray
koko:ol homngas, kawaS 'am mintaewaeh ila, ray kinaloehan
kaehoy 'ae'ae:iw makSa', kayzaeh ka Saehoe'en. "

manabih sizaeh, korkoring manpaehpaeh ka 'ae'az homayap ila,
hakowaw hinSaySaylo' ray kawaS babaw, 'ima homngas " kowaw,
kokowaw, kowaw, kokowaw... " kinhomayap kinra:waS, bi:il ila 'okay
kita'ani ila ray kawaS.

化成鷹

婆婆在挖甘藷，孫女 maya' 坐在石頭上，被突然冒出的石龍子嚇哭。婆婆抱起她說故事安慰她：從前有個小孩想射石龍子，求爸媽和祖母做弓箭都被拒絕。他憤怒地綁上飛禽羽翅，拿走簸箕裡的薏米串珠，爬上楓樹頂端學鳥振翅飛，他還哭著將串珠丟入池中，小孩說要走了，教大家在久旱時用薏米串珠和米糕祭天，他若在河邊鳴叫就會下雨、農作豐收；若雨不停，重複祭儀，他在山上鳴叫天氣就會放晴，雜木易燃。說完，小孩化為老鷹，鳴叫著飛向天際。